



Republika e Kosovës
Republika Kosova-Republic of Kosovo
Qeveria –Vlada-Government



Ministria e Shëndetësisë-Ministarstva Zdravstva-Ministry of Health

QENDRA KLINIKE UNIVERSITARE E KOSOVËS

STATUTI

Maj 2014

1. Bazuar në nenin 17, nenin 19, nenin 20, nenin 21, nenin 45 paragrafi 3, dhe nenin 63 të Ligjit për Shëndetësi Nr. 04/L-125, nenin 2 dhe 12 paragrafi 2.11 të Statutit të Shërbimit Spitalor dhe Klinik Universitar të Kosovës (në vazhdim të tekstit, SHSKUK),; në propozim të Bordit Drejtues të SHSKUK Ministria e Shëndetësisë e miraton Statutin e Qendrës Klinike Universitare të Kosovës (në vazhdim të tekstit QKUK).

I. Dispozitat e përgjithshme

Neni 1

1. Me këtë Statut përcaktohet emërtimi, selia, udhëheqja, organizimi, veprimtaria, trupat, aktet e përgjithshme, pronësia, financimi, transparenca, fshehtësia afariste dhe profesionale, zhvillimi i vazhdueshëm profesional, dhe mbikëqyrja e brendshme, përkritazi me ushtrimin e veprimtarisë së njësive përbërëse organizative të QKUK si dhe QKUK si tërësi.
2. QKUK ka filluar punën në Dhjetor të vitit 1958 si Spitali i Prishtinës dhe ushtroi veprimtarinë si i këtillë deri me 7 Nëntor 1973 kur u bashkua me Fakultetin e Mjekësisë të Universitetit të Prishtinës (në vazhdim të tekstit, FM i UP) si Organizatë e Punës së Bashkuar; kurse prej 29 Dhjetorit 1977 deri me 1991 zhvilloi veprimtarinë si organizatë punuese e FM të UP me Klinikat përbërëse. Nga Qershori i vitit 1999 ka zhvilluar veprimtarinë si QKUK.

Neni 2

1. QKUK dhe njësitë e saj përbërëse organizative janë njësi përbërëse organizative dhe funksionale të SHSKUK.
2. Njësitë përbërëse organizative të QKUK kanë statusin e personit juridik, me cilësi të autoritetit punëdhënës.
3. Organizimi dhe funksionimi i njësive përbërëse organizative të QKUK përcaktohet me Statutin e tyre.
4. Statuti i njësive përbërëse organizative të QKUK miratohet nga Ministri i Shëndetësisë në propozim të Bordit Drejtues të SHSKUK.
5. Njësitë përbërëse organizative të QKUK në përputhje me nenin 21 të Ligjit për Shëndetësi të Kosovës Nr. 04/L -125, në bashkëpunim kontraktuar me Fakultetin e Mjekësisë të Universitetit "Hasan Prishtina" (FM – UP), organizojnë, ofrojnë dhe zbatojnë procesin mësimor universitar, punën kërkimore shkencore, zhvillimin e vazhdueshëm profesional, si dhe shkollimin specialistik dhe sub-specialistik të profesionistëve shëndetësorë.
6. Njësitë përbërëse organizative të QKUK zbatojnë kujdesin shëndetësor tretësor në nivel të vendit si dhe kujdesin shëndetësor dytësor për komunën e Prishtinës dhe komunat e afërta.

Neni 3

1. Njësitë përbërëse organizative të QKUK disponojnë me mjetet dhe pasurinë e cila është pronë e SHSKUK.
2. Njësitë përbërëse organizative të QKUK si institucione shëndetësore publike janë përvetësuese të fondeve nga Buxheti i Kosovës si dhe burimeve të tjera financiare të përcaktuara me dispozitat ligjore në fuqi.

II. Emërtimi dhe selia

Neni 4

1. Emri i institucionit të veçantë (njësisë përbërëse organizative të QKUK) është Klinika e Qendrës Klinike Universitare të Kosovës (QKUK).
2. Emri përfaqësues i të gjitha njësive përbërëse organizative të QKUK është Qendra Klinike Universitare e Kosovës.
3. Shenja njohëse e QKUK është shqiponja dykrahëshe, në këmbët e saj me gjarprin e mbështjellë si shenjë mbrojtëse në mes të vulës.
4. Emërtimi i njësive përbërëse organizative të QKUK mbishkruhet në gjuhët në përdorim zyrtar.
5. Ndryshimi i emrit dhe selisë së njësive përbërëse organizative të QKUK bëhet me propozim të njësive dhe me aprovimin e SHSKUK.
6. Selia e QKUK dhe njësive të saja përbërëse organizative gjendet në adresën: "Rrethi i Spitalit" p.n., Prishtinë.

Statusi dhe prezantimi

Neni 5

1. Njësitë përbërëse organizative të QKUK janë institucione shëndetësore të cilat evidentohen në regjistrin e njësive përbërëse organizative të SHSKUK.
2. Njësitë përbërëse organizative të QKUK janë njësi autonome të cilat organizojnë dhe drejtojnë punët e tyre të rregullta administrative dhe profesionale në funksion të përmbushjes së detyrave dhe përgjegjësisë ligjore, përveç detyrave dhe përgjegjësisë të cilat sipas Ligjit për shëndetësi dhe Statutit të SHSKUK-së i janë caktuar SHSKUK-së.
3. Njësitë përbërëse organizative të QKUK ofrojnë shërbime shëndetësore sipas parimeve të përcaktuara në Ligjin për Shëndetësi si dhe dispozitave të tjera ligjore në fuqi.
4. Çfarëdo fitimi, tjetërsimi, apo shitje e patundshmërive të njësive përbërëse organizative të QKUK u nënshtrohet akteve ligjore në fuqi.
5. Për çfarëdo fitimi, tjetërsimi, apo shitje të patundshmërive të njësive përbërëse organizative të QKUK nevojitet miratimi i Bordit Drejtues të SHSKUK.
6. Në rast të nënshkrimit të kontratave nga paragrafi 3 i këtij neni, njësitë përbërëse organizative të QKUK paraqiten si subjekte të pavarura juridike dhe afariste.
7. Qarkullimi i mjeteve financiare të njësive përbërëse organizative të QKUK bëhet përmes kodit organizativ të SHSKUK si dhe nën kodeve të njësive të tij përbërëse nga neni 12.2 i këtij Statuti, të propozuara nga Ministria e Shëndetësisë dhe të aprovuara nga Ministria e Financave
8. Drejtorët e njësive përbërëse organizative të QKUK dhe Drejtori i përgjithshëm i SHSKUK kanë të gjitha autorizimet për përfaqësimin juridik dhe afarist të njësive përbërëse organizative të QKUK.

Neni 6

1. Njësitë përbërëse organizative të QKUK kanë vulën e cila në cilësinë e personit juridik paraqitet si Klinika ose Shërbimi Klinik i Qendrës Klinike Universitare të Kosovës;
 - 1.1 Vula e rrumbullakët ka shumë rrrathë koncentrikë dhe përmban këto të dhëna:
 - 1.1.1 në rrethin e parë të jashtëm shkruhet Republika e Kosovës;
 - 1.1.2 në rrrathët tjerë shkruhet emërtimi Shërbimi Spitalor dhe Klinik Universitar, emërtimi i klinikës ose shërbimit klinik të veçantë, dhe selia;
 - 1.1.3 në sipërfaqen e mbetur brenda rrethit të vulës vendoset stema (shqiponja dykrahëshe në këmbët të saj me gjarprin e mbështjellë si shenjë mbrojtëse) e QKUK-së.
 - 1.1.4 diametri i vulës së rrumbullakët është prej 40 mm, 50 mm dhe 60 mm;
2. Vula duhet të jetë në gjuhët zyrtare në përdorim në Kosovë.
3. Njësia përbërëse organizative e QKUK posedon vulën katrore, me dimensione 35 mm me 70 mm e cila përdoret për protokollimin e shkresave, ndërsa përmban:
 - 3.1 në pjesën e epërme të vulës, në anën e majtë vihet Stema e Republikës së Kosovës, ndërsa në anën e djathtë vihet Stema e SHSKUK.
 - 3.2 emërtimi Republika e Kosovës;
 - 3.3 Shërbimi Spitalor dhe Klinik Universitar;
 - 3.4 emërtimi Klinika ose Shërbimi klinik i caktuar i SHSKUK, shkruhet me shkronja të mëdha të shtypit;
 - 3.5 numri i protokollit i njësisë përbërëse organizative të QKUK duke lënë hapësirë për shënimin e numrit të protokollit të shkresës;
 - 3.6 hapësira ku do të shënohet numri i faqeve të bashkangjitura;
 - 3.7 hapësira ku do të shënohet data, muaji dhe viti, /.././20xx;
 - 3.8 vendi i selisë së QKUK dhe njësive përbërëse organizative të saj.
4. Për numrin e vulave, mënyrën e përdorimit dhe autorizimin e personit për përdorim dhe ruajtje vendos Drejtori i përgjithshëm i SHSKUK, në pajtim me Ligjin për Vula në Institucionet e Republikës së Kosovës.
5. Në rast se përdoret më shumë se një ekzemplar i vulës së njëjtë, çdo ekzemplar i saj shënohet me numër rendor të shkruar me shifër romake në mes të stemës dhe emrit të institucionit.

III Veprimtaria e QKUK

Veprimtaria shëndetësore

Neni 7

1. Njësitë përbërëse organizative të QKUK zbatojnë kujdesin shëndetësor sipas Ligjit për Shëndetësi, dhe akteve juridike të bazuara në ligj.
2. Njësitë përbërëse organizative të QKUK ofrojnë shërbime shëndetësore të nivelit tretësor spitalor dhe jashtë-spitalor për të gjithë qytetarët e Kosovës dhe shërbime shëndetësore të nivelit dytësor për rajonin e Prishtinës.
3. Listën e shërbimeve shëndetësore që ofrohen në njësitë përbërëse organizative të QKUK e

miraton Bordi Drejtues i SHSKUK.

4. Njësitë përbërëse organizative të QKUK hyjnë në marrëdhënie kontraktuale me Agjencionin e Financimit Shëndetësor në Ministrinë e Shëndetësisë me prioritet.
5. Njësitë përbërëse organizative të QKUK zbatojnë standardet e cilësisë së shërbimeve shëndetësore të miratuara nga Ministria e Shëndetësisë dhe Oda e Profesionistëve Shëndetësorë.
6. Njësitë përbërëse organizative të QKUK sigurojnë dhe zbatojnë sistemin unik të informimit shëndetësor si pjesë e sistemit të integruar të informimit shëndetësor në nivel të vendit.
7. Njësitë përbërëse organizative të QKUK janë të obliguara të mbajnë dokumentacionin si dhe bazën e shënimeve shëndetësore për pacientët e tyre, në mënyrën e përcaktuar me ligj.
8. Njësitë përbërëse organizative të QKUK duhet t'i përmbushin standardet themelore për funksionimin e institucioneve shëndetësore.
9. Njësitë përbërëse organizative të QKUK bashkëpunojnë me institucionet e tjera shëndetësore dhe marrin pjesë në aktivitetet shëndetësore në nivel kombëtar dhe ndërkombëtar.

Veprimtaria Arsimore

Neni 8

1. Veprimtaria arsimore realizohet nga Katedrat e FM – UP në njësitë përbërëse organizative të QKUK.
2. Njësitë përbërëse organizative të QKUK me infrastrukturën dhe resurset e tyre njerëzore mbështesin veprimtarinë arsimore në të gjitha drejtimet e FM – UP dhe të institucioneve të tjera të akredituara të arsimit të lartë, si dhe të shkollave të mesme publike të mjekësisë, duke siguruar:
 - 2.1 Organizimin dhe realizimin e programit mësimor për studime universitare themelore në të gjitha drejtimet e FM – UP;
 - 2.2 Organizimin dhe realizimin e programit mësimor për studime universitare themelore me institucione tjera të akredituara të arsimit të lartë shëndetësor që kontraktohet në mes njësisë përbërëse organizative të QKUK dhe institucionit përkatës arsimor me miratimin paraprak të Bordit Drejtues të SHSKUK;
 - 2.3 Organizimin dhe realizimin e programit të specializimeve dhe sub-specializimeve në lëmitë e ndryshme mjekësore;
 - 2.4 Organizimin dhe zbatimin e formave të ndryshme të edukimit të vazhdueshëm pas-universitar, profesional dhe shkencor, në pajtim me ligjin;
 - 2.5 Organizimin dhe zbatimin e punës profesionale;
 - 2.6 Bashkëpunimin dhe pjesëmarrjen në aktivitetet e promovimit të shëndetit në nivel kombëtar dhe ndërkombëtar;
 - 2.7 Punën në përshtatjen dhe përfshirjen e standardeve Evropiane në lëmin e shëndetësisë.

Veprimtaria kërkimore shkencore

Neni 9

1. Veprimtaria kërkimore-shkencore në njësitë përbërëse organizative të QKUK, ushtrohet në bashkëpunim me FM – UP, në përputhje me ligjet në fuqi, praktikën mjekësore dhe përvojën e

mirë institucionale.

2. Njësitë përbërëse organizative të QKUK e ushtrojnë këtë funksion në bashkëpunim me institucionet e shkollimit shëndetësorë, si dhe me qendra të specializuara për kërkime shkencore vendore dhe ndërkombëtare.
3. Për realizimin e kësaj veprimtarie njësitë përbërëse organizative të QKUK lidhin marrëveshje të veçanta me institucionet kërkimore-shkencore si dhe me institucione të tjera relevante vendore dhe ndërkombëtare pas miratimit nga Bordi Drejtues i SHSKUK.
4. Njësitë përbërëse organizative të QKUK bëjnë aftësimin e hulumtuesve të rinj, si dhe sigurojnë mentorë, ekspertë dhe recensues për vlerësimin e projekteve kërkimore-shkencore.

Shërbimet e përbashkëta të QKUK

Neni 10

1. Veprimtaritë shëndetësore, arsimore dhe kërkimore-shkencore nga neni 7, neni 8 dhe neni 9 i këtij Statuti, mbështeten nga:
 - 1.1 Drejtorati për shërbime të përbashkëta teknike – administrative:
 - 1.1.1 Sektori i Personelit;
 - 1.1.2 Sektori i Administratës;
 - 1.1.3 Zyra për Çështje Juridike;
 - 1.1.4 Sektori i Buxhetit dhe Financave;
 - 1.1.5 Sektori i Prokurimit, në pajtim me ligjin;
 - 1.1.6 Sektori i mirëmbajtjes së pajisjeve mjekësore;
 - 1.1.7 Sektori i Shërbimeve teknike;
 - 1.1.8 Sektori i ushqimit dhe shërbimit të tij;
 - 1.1.9 Sektori i Sistemit të Informimit Shëndetësor;
 - 1.1.10 Sektori i Pronës.
 - 1.2 Nën-njësia e Auditimit, në pajtim me ligjin.
 - 1.3 Sektori i furnizimit me barna dhe material hargjues-medicjonal.
2. Udhëheqësit e njësive organizative nga paragrafi 1 i këtij neni zgjedhën në bazë të konkursit publik.

Neni 11

1. Organizimi i brendshëm i klinikave dhe shërbimeve klinike të QKUK, si dhe Drejtoratit për shërbime të përbashkëta teknike – administrative rregullohet me akte të veçanta të përgjithshme – Statute, të përgatitura si propozime nga njësitë përbërëse organizative të QKUK dhe të miratuara nga Ministri i Shëndetësisë në propozim të Bordit Drejtues të SHSKUK.
2. Menaxhimi i përbashkët i shërbimeve teknike të njësive përbërëse organizative të QKUK, FM

– UP, si dhe institucioneve të tjera brenda rrethit të QKUK janë subjekt i marrëveshjes së përbashkët ndërmjet këtyre institucioneve

Organizimi i QKUK

Neni 12

1. QKUK është e organizuar në Klinika, Shërbime klinike, dhe Shërbimin e përbashkët teknik – administrativ.
2. Për tu themeluar një Klinikë e QKUK është e domosdoshme që në përbërjen e saj të jenë të punësuar së paku tre (3) specialistë të licencuar të lëmisë përkatëse prej të cilëve së paku dy (2) profesor dhe dy (2) doktor ose magjistër të shkencave mjekësore.
3. Për tu themeluar një Shërbim klinik i QKUK është e domosdoshme që në përbërjen e tij të jenë të punësuar së paku tre (3) specialistë të licencuar të fushave përkatëse.
4. Në momentin që një Shërbim klinik i QKUK i plotëson kriteret e përcaktuara me paragrafin 2 ose paragrafin 3 të këtij neni e fiton të drejtën për të avancuar statusin organizativ në Klinikë ose Institut.
5. Në raste të veçanta, themelimi i Klinikës ose Shërbimit klinik të QKUK-së bëhet me vendimin e Bordit Drejtues të SHSKUK me miratim të Ministrit të Shëndetësisë.
6. Veprimtaria shëndetësore, arsimore dhe kërkimore shkencore në QKUK realizohet nga këto njësi përbërëse organizative:
 - 6.1 Shërbimi klinik i Emergjencës;
 - 6.2 Klinika e Anestezionit dhe Mjekimit Intensiv;
 - 6.3 Klinika e Kirurgjisë Abdominale;
 - 6.4 Klinika Neurokirurgjisë;
 - 6.5 Klinika e Kirurgjisë së Fëmijëve;
 - 6.6 Klinika e Ortopedisë dhe Traumatologjisë Lokomotore;
 - 6.7 Shërbimi klinik i Orto-protetikës;
 - 6.8 Klinika e Urologjisë;
 - 6.9 Klinika e Kirurgjisë Torakale;
 - 6.10 Klinika e Kirurgjisë Vaskulare;
 - 6.11 Klinika e Kirurgjisë Plastike, Rekonstruktime dhe Estetike;
 - 6.12 Klinika e Obstetrikës dhe Gjinekologjisë;
 - 6.13 Klinika e Otorinolaringologjisë;
 - 6.14 Klinika e Oftalmologjisë;
 - 6.15 Klinika e Kirurgjisë Maksillo-faciale;
 - 6.16 Klinika e Kardiologjisë;
 - 6.17 Shërbimi klinik i Kardiokirurgjisë dhe kardiologjisë invazive;
 - 6.18 Klinika e Reumatologjisë,
 - 6.19 Klinika e Alergologjisë dhe Imunologjisë Klinike;

- 6.20 Klinika e Endokrinologjisë;
 - 6.21 Klinika e Gastroenterologjisë me Hepatologji;
 - 6.22 Klinika e Hematologjisë;
 - 6.23 Klinika e Nefrologjisë;
 - 6.24 Klinika e Sëmundjeve Ngjitëse;
 - 6.25 Klinika e Psikiatrisë;
 - 6.26 Klinika e Neurologjisë;
 - 6.27 Klinika e Dermatovenerologjisë;
 - 6.28 Klinika e Pediatriisë;
 - 6.29 Klinika e Neonatologjisë;
 - 6.30 Klinika e Pulmologjisë;
 - 6.31 Klinika e Mjekësisë Fizikale me Rehabilitim dhe Mjekësi Sportive;
 - 6.32 Klinika e Biokimisë Mjekësore;
 - 6.33 Klinika e Radiologjisë;
 - 6.34 Klinika e Onkologjisë;
 - 6.35 Shërbimi klinik i Mjekësisë Nukleare
 - 6.36 Instituti i Psikiatrisë Forenzike.
 - 6.37 Institutet para-klinike (deri në marrëveshje definitive me Fakultetin e Mjekësisë)
7. SHSKUK në përputhje me legjislacionin në fuqi dhe procedurën për miratimin dhe ndryshimin e këtij Statuti, krijon njësi të tjera përbërëse organizative apo merr vendim për shuarjen e tyre, në përputhje me aktivitetin dhe nevojat, në funksion të përparimit dhe të zhvillimit të veprimtarisë së saj.

Neni 13

1. QKUK drejtohet dhe udhëhiqet nga Drejtori i përgjithshëm i SHSKUK.
QKUK koordinohet nga Bordi i Drejtorëve të QKUK.
2. Bordi i drejtorëve përbëhet nga drejtorët e të gjitha njësive organizative të QKUK dhe funksionimi i tij rregullohet me akt të veçantë nënligjor nga Bordi Drejtues i SHSKUK
3. Bordi i drejtorëve të QKUK ka kompetenca këshillëdhënëse për Bordin Drejtues të SHSKUK
4. Zgjedhja dhe autorizimet e Drejtorit të Përgjithshëm të SHSKUK janë të përcaktuara me Statutin e SHSKUK.
5. Në mbledhjet e Bordit të drejtorëve të QKUK merr pjesë në cilësinë e vëzhguesit përfaqësuesi i deleguar nga Federata e Sindikatave të Shëndetësisë së Kosovës (FSSHK), në pajtim me Kontratën Kolektive Sektoriale të nënshkruar në mes të Ministrisë së Shëndetësisë dhe FSSHK, si dhe në pajtim me ligjet në fuqi.

6. Zyra e Drejtorit të Përgjithshëm të SHSKUK përbëhet nga:
 - 6.1 Drejtori i Përgjithshëm i SHSKUK (1);
 - 6.2 Drejtori për Arsimit dhe Shkencë (1);
 - 6.3 Nëpunësi tekniko-administrativ (1);
 - 6.4 Zyrtari për media dhe marrëdhëniet me publikun (1).
 - 6.5 Zyra e Drejtorit të Përgjithshëm të SHSKUK mbështet punën e Bordit të Drejtorëve të QKUK.
7. Zyra e Drejtorit të përgjithshëm mbështetet nga shërbimet e përbashkëta teknike-administrative të SHSKUK
8. Drejtori për Arsimit dhe Shkencë emërohet nga Bordi Drejtues i SHSKUK në propozim të fakultetit përkatës të shkencave mjekësore, në pajtim me Statutin e SHSKUK.

Trupat profesionale

Neni 14

1. Brenda QKUK organizohen Shërbimet profesionale si forma klinike të shërbimeve të integruara të nivelit dytësor dhe tretësor të kujdesit shëndetësor, si dhe Bordet e tyre mbikëqyrëse në pajtim me Statutin e SHSKUK dhe aktin e veçantë nën-ligjor të nxjerrë nga Ministria e Shëndetësisë.
2. Njësitë përbërëse organizative të QKUK për përmbushjen e detyrave të veçanta, përmes Drejtorit të Përgjithshëm dhe Bordit të Drejtorëve të SHSKUK-së formojnë brenda tyre edhe trupa të tjera profesionale:
 - 2.1 Kolegji i Kolegjeve profesionale të Klinikave dhe Shërbimeve klinike;
 - 2.2 Komiteti për Hulumtime Shkencore-Profesionale;
 - 2.3 Komiteti për Kontroll të Cilësisë;
 - 2.4 Komiteti për Edukimin e Vazhdueshëm Profesional;
 - 2.5 Komiteti Etik-Profesional;
 - 2.6 Komiteti për infeksionet brenda-spitalore.
3. Përbërja, autorizimet, si dhe mënyra e punës së trupave profesionale përcaktohen me akte të brendshme të SHSKUK të propozuara nga Bordi i Drejtorëve i QKUK dhe të miratuara nga Drejtori i Përgjithshëm i SHSKUK.
4. Drejtori i Përgjithshëm i SHSKUK sipas nevojës mund të formojë edhe trupa të tjerë profesional pranë QKUK, detyrat e të cilave përcaktohen me dispozitat ligjore në fuqi dhe me akte të brendshme të njësisë përbërëse organizative të QKUK.

Themelimi i marrëdhënies së punës në njësitë përbërëse organizative të QKUK

Neni 15

1. Punonjësit në njësitë përbërëse organizative të QKUK themelojnë marrëdhënie pune në përputhje me ligjin e Punës.
2. Bordi i Drejtorëve i QKUK paraqet në Bordin Drejtues të SHSKUK nevojat aktuale për stafin e saj.
3. QKUK pranon në marrëdhënie pune profesionistë shëndetësorë dhe jo-shëndetësorë në bazë të mjeteve buxhetore në dispozicion për këtë qëllim që vijnë nga Ministria e Shëndetësisë si dhe në bazë të mjeteve financiare në dispozicion të realizuara në bazë të nenit 65 të Ligjit për Shëndetësi si dhe nenit 10 dhe nenit 15 të Statutit të SHSKUK.
4. QKUK bënë kompensimin financiar për shërbimin shëndetësor që ofron stafi akademik i FM – UP në QKUK, si pagë sekondare ose si pagë primare, varësisht nga përcaktimi i tyre, në pajtim me legjislacionin në fuqi.
5. FM – UP kryen kompensimin financiar për stafin profesional klinik të QKUK të angazhuar në procesin arsimor dhe kërkimor-shkencor në bazë të kontratës së veçantë në pajtim me Ligjin e punës.
6. Obligimet, detyrat dhe përgjegjësitë e stafit akademik të FM – UP ndaj njësive përbërëse organizative të QKUK specifikohen në kontratën nga paragrafi 5 i këtij neni.
7. Kontrata nga paragrafi 5 i këtij neni duhet të përcaktojë se stafi akademik i FM – UP që është i punësuar në QKUK është i angazhuar me orar të plotë të punës, në pajtim me ligjin, në aktivitetet e Klinikës ose Shërbimit klinik të QKUK të përcaktuara me këtë Statut; dhe se zbatimi i normës përkatëse të orëve akademike të përcaktuara me Statutin e UP bëhet gjatë orarit të punës në QKUK/SHSKUK.
8. Bordi i Drejtorëve i QKUK dhe FM – UP do të përpilojnë bashkërisht listat e stafit të përbashkët të njësive përbërëse organizative të QKUK dhe FM – UP, që do të kompensohen në bazë të legjislacionit në fuqi dhe akteve të përgjithshme të SHSKUK dhe UP.
9. Puna e stafit akademik të FM – UP gjatë zbatimit të shkollimit specialistik dhe sub-specialistik në QKUK dhe njësitë e tjera përbërëse organizative të SHSKUK duhet të paraqet pjesë të normës së tyre akademike për mbajtjen e mësimit në UP.
10. Çështjet nga pikat 2-6 e këtij neni rregullohen me Marrëveshje të përbashkët në mes të SHSKUK, Ministrisë së Shëndetësisë, Ministrisë së Arsimit, Shkencës dhe Teknologjisë, dhe UP.

Zgjedhja në pozitat udhëheqëse

Neni 16

1. Drejtorët e Klinikave dhe Shërbimeve klinike si dhe shefat e njësive përbërëse të këtyre njësive organizative të QKUK, zgjidhen nga radhët e specialistëve të lëmive përkatëse me thirrje akademike ose me thirrje shkencore.
2. Në mungesë të kandidatëve me thirrje akademike ose shkencore, Drejtorët dhe shefat e njësive organizative të QKUK nga paragrafi 1 i këtij neni zgjidhen nga radhët e specialistëve të lëmive përkatëse me vlerësimin më të mirë gjatë përzgjedhjes.
3. Përparësi me rastin e përzgjedhjes së specifikuar në paragrafin 1 dhe paragrafin 2 të këtij neni kanë kandidatët me kualifikime të veçanta në lëmin e menaxhmentit shëndetësor.
4. Drejtorët e Klinikave dhe Shërbimeve klinike duhet të jenë me orar të plotë të punës në SHSKUK.

5. Me njësitë përbërëse organizative të QKUK udhëheq:
 - 5.1 Drejtori i Klinikës,
 - 5.2 Drejtori i Shërbimit klinik,
 - 5.3 Drejtori i Shërbimeve të përbashkëta administrative dhe ndihmëse teknike,
6. Shpallja e konkursit për postet udhëheqëse nga paragrafi 4 i këtij neni bëhet nga Drejtori i Përgjithshëm i SHSKUK pas aprovimit të Bordit Drejtues të SHSKUK, në pajtim me ligjin.
7. Zgjedhjen në pozitë udhëheqëse nga neni 16 i këtij Statuti e bën paneli pesë (5) anëtarësh i emëruar nga Drejtori i Përgjithshëm i SHSKUK-së pas miratimit nga Bordi Drejtues i SHSKUK, prej të cilëve njëri duhet të jetë i deleguar nga FM – UP (1), dhe njëri prej Bordit Drejtues të SHSKUK.
8. Zgjedhjen në pozitën udhëheqëse të njërive klinike brenda njësisë organizative të QKUK (Shef i Repartit/Njësisë) e bën Komisioni i formuar sipas konkursit të brendshëm.

Neni 17

1. Drejtorët e Klinikave e Shërbimeve klinike, si dhe udhëheqësit e njërive të tjera përbërëse organizative të QKUK nga neni 16 zgjidhen me Konkurs publik.
2. Udhëheqësit nga neni 16 janë përgjegjës për planifikimin, organizimin dhe zbatimin e veprimtarisë së gjithëmbarshme të njërive përkatëse.
3. Udhëheqësit nga neni 16 i përgjigjen Drejtorit të Përgjithshëm të SHSKUK.
4. Shefat e njërive klinike u përgjigjen Drejtorëve të Klinikave apo Shërbimeve klinike.

Organizimi sindikal

Neni 18

1. Në njësitë përbërëse organizative të QKUK mund të veprojnë organizata sindikale ku punëtorët me anëtarësim do t'i realizojnë të drejtat dhe interesat e tyre të garantuara me konventat ndërkombëtare të punës, ligjet e aplikueshme si dhe marrëveshjet përkatëse.
2. Anëtarësimi në organizatat sindikale është vullnetar dhe bëhet me deklaram individual.
3. Në pajtim me Ligjin për organizimin sindikal, sindikatë përfaqësuese është FSSHK ose sindikata që ka mbi 50% të anëtarësisë në njësinë përkatëse organizative të QKUK.
4. Në rast greve të punëtorëve në njësitë përbërëse organizative të QKUK duhet të sigurohet minimumi i ofrimit të shërbimeve shëndetësore, sipas akteve ligjore në fuqi.
5. Njësitë përbërëse organizative të QKUK zbatojnë obligimet dhe detyrat e ndërsjella nga Kontrata Kolektive e Përgjithshme dhe Kontrata kolektive sektoriale në pajtim me ligjin.

VI. Shkollimi Specialistik, Shkollimi sub-specialistik, dhe Edukimi i Vazhdueshëm Profesional

Neni 19

1. Në kuadër të QKUK organizohet Shkollimi Specialistik, Shkollimi sub-specialistik, dhe Edukimi i Vazhdueshëm Profesional i punëtorëve shëndetësorë, bazuar në dispozitat ligjore në fuqi..

2. QKUK duhet të sigurojë dhe ofrojë resurset e nevojshme për zbatimin e Shkollimit Specialistik, Shkollimit Sub-specialistik, dhe Edukimit të Vazhdueshëm Profesional sipas planeve të aprovuara.

VII. Mbikëqyrja e QKUK

Neni 20

1. Mbikëqyrja e brendshme e veprimtarisë ekonomike dhe financiare të QKUK bëhet nga Auditori i brendshëm i QKUK.
2. Mbikëqyrja e brendshme e punës profesionale në QKUK kryhet në mënyrën e paraparë me n mbi mbikëqyrjen e brendshme të punës profesionale.
3. Mbikëqyrja e jashtme e QKUK bëhet nga Auditori i Përgjithshëm i Kosovës, Inspektorati Shëndetësor, Inspektorati Sanitar, dhe Inspektorati i Punës.

VIII. Aktet e përgjithshme

Neni 21

1. Aktet e përgjithshme të QKUK janë: Statuti, Urdhëresat administrative, Rregulloret, e Vendimet.

Neni 22

1. Më propozim të Drejtorit të Përgjithshëm të SHSKUK, Bordi i Drejtorëve i QKUK, në përputhje me Statutin e SHSKUK, Statutin e QKUK dhe legjislacionin përkatës, nxjerr këto akte të përgjithshme të QKUK:
 - 1.1 Rregulloren mbi organizimin e brendshëm, sistematizimin e vendeve të punës dhe përshkrimin e detyrave të punës për të punësuarit në njësitë përbërëse organizative të QKUK;
 - 1.2 Rregulloren për punë;
 - 1.3 Rregulloren për gradim, pagesa dhe të drejta tjera materiale të punëtorëve nëse me akte të tjera nuk është rregulluar ndryshe;
 - 1.4 Rregulloren për mbrojtjen në punë;
 - 1.5 Rregulloren për mbrojtje kundër zjarrit;
 - 1.6 Rregulloren për kontabilitetin e brendshëm;
 - 1.7 Rregulloren për rendin shtëpiak;
 - 1.8 Rregulloren për mbikëqyrjen e brendshme;
 - 1.9 Rregulloren për parandalimin e infeksioneve brenda-spitalore;
 - 1.10 Rregulloren e punës në rrethana të gjendjes së jashtëzakonshme;
 - 1.11 Rregullore të tjera të domosdoshme për mbarëvajtjen e punës në njësitë përbërëse organizative të QKUK;

2. Aktet e përgjithshme nga Neni 22, miratohen nga Bordi Drejtues i SHSKUK.

IX. Pronësia, Buxheti dhe Financat

Pronësia

Neni 23

1. Pasurinë me të cilën disponojnë njësitë përbërëse organizative të QKUK e përbëjnë mjetet, të drejtat dhe të mirat materiale, të cilat kanë qenë të evidentuara si pronë shoqërore, më të cilat QKUK ka disponuar në datën e hyrjes në fuqi të Ligjit për Shëndetësi 04/L-125.
2. Pasurinë të cilën e disponojnë njësitë përbërëse organizative të QKUK e përbëjnë edhe mjetet, të drejtat dhe të mirat materiale, të cilat pas hyrjes në fuqi të Ligjit për Shëndetësi 04/L-125 QKUK i ka fituar me punë, donacione ose nga të hyra të tjera.

Buxheti

Neni 24

1. Çështjet buxhetore dhe financiare të njësive përbërëse organizative të QKUK administrohen në mënyrë transparente në pajtim me Statutin e SHSKUK, këtë Statut si dhe rregullat dhe rregulloret mbi përdorimin e fondeve nga Buxheti i Kosovës të Ministrisë së Financave.
2. Në pajtim me nenin 15, paragrafi 9, të Statutit të SHSKUK, QKUK mban llogari të veçantë qendrore financiare pranë thesarit të shtetit, si dhe llogaritë financiare për secilën nga njësitë e tij përbërëse organizative.
3. Në pajtim me nenin 65, paragrafi 3 të Ligjit për shëndetësi 04/L-125 dhe nenin 15, paragrafi 7 të Statutit të SHSKUK, QKUK ka të drejtë të investojë fitimin e realizuar në përmirësimin e performancës së saj të përgjithshme si dhe të njësive të saja përbërëse organizative.
4. Në pajtim me nenin 2 paragrafi 6 të Ligjit për Menaxhimin e Financave Publike dhe Përgjegjësitë SHSKUK do të hapë llogari të ndarë, përkatësisht nën-llogari bankare pranë Bankës Qendrore të Kosovës.
5. Buxheti dhe llogaritë e QKUK duhet të përfshijnë në mënyrë transparente të gjitha shpenzimet operative të njësive të saja përbërëse organizative.
6. Prokurimi në QKUK bëhet në përputhje me dispozitat e Ligjit të Prokurimit Publik të Kosovës.
7. QKUK ia prezanton buxhetin vjetor Bordit Drejtues të SHSKUK për miratim sipas planit të punës.

Financimi

Neni 25

1. QKUK shfrytëzon burimet financiare në pajtim me nenin 60 dhe nenin 65 të Ligjit për Shëndetësi 04/L-125 si dhe legjislacionin tjetër në fuqi.
2. Në pajtim me këtë Statut, QKUK për veprimtarinë e saj arsimore dhe kërkimoro – shkencore

shfrytëzon mjete nga buxheti i FM – UP dhe institucionet e tjera të akredituara arsimore sipas ligjeve dhe akteve nën-ligjore në fuqi, si dhe vendimeve të nxjerra nga Bordi Drejtues i SHSKUK.

3. Pagesat për shërbimet e ofruara në QKUK, si burim i financimit të aktiviteteve të përcaktuara me aktet ligjore dhe aktet nën-ligjore në fuqi do të bëhen në bazë të çmimoreve të propozuar nga Bordi i Drejtorëve të QKUK, të aprovuar nga Bordi Drejtues i SHSKUK.
4. QKUK nxjerr akte të veçanta për llojin dhe shumën e pagesave të ndryshme, përfshirë pagesat për performancën e profesionistëve shëndetësorë të njësive përbërëse organizative të QKUK, në pajtim me aktet e përgjithshme të nxjerra nga Bordi Drejtues i SHSKUK.

X. Transparenca në punë

Neni 26

1. Struktura, kushtet, mënyra e ofrimit të shërbimeve shëndetësore si dhe kryerja e veprimtarisë së njësive përbërëse organizative të QKUK janë publike dhe transparente ndaj personave juridik dhe fizik, në pajtim me ligjin.

Neni 27

1. Informatat, të dhënat, dhe qasja në dokumentacion mbi veprimtarinë shëndetësore, rregullohen në pajtim me Ligjin për qasje në dokumente publike dhe aktet përkatëse nën-ligjore.

XI. Sekretet profesional

Sekretet afarist dhe profesional

Neni 28

1. Zbulim i sekretit afarist dhe profesional konsiderohet dhënia e dokumentacionit dhe të dhënave të tjera në shikim personave të paautorizuar, që do të shkaktonte dëm reputacionit dhe interesit afarist dhe profesional të QKUK dhe njësive të tij përbërëse organizative të, në pajtim me ligjin.

Neni 29

1. Sekrete afariste dhe profesionale nga neni 28 i këtij Statuti konsiderohen:
 - 1.1 Dokumentet të cilat Bordi Drejtues i SHSKUK në propozim të Drejtorit të përgjithshëm i vlerëson si sekrete.
 - 1.2 Të dhënat të cilat organi kompetent i konsideron sekrete dhe ja ofron institucionit si të tillë;
 - 1.3 Masat e veprimit në rast të krijimit të situatave të jashtëzakonshme;
 - 1.4 Dokumentacioni që përmban planin e sigurisë fizike dhe teknike të punëtorëve dhe pasurisë së institucionit;
 - 1.5 Të dhënat tjera, publikimi i të cilave do të ishte në kundërshtim me interesat e institucionit dhe themeluesit të tij, të përcaktuara me ligjet në fuqi.

Neni 30

1. Mos ruajtja e sekretit afarist dhe profesional konsiderohet shkelje e rëndë e detyrave të punës.
2. Për ruajtjen e sekretit afarist dhe profesional drejtpërsëdrejti kujdeset Drejtori i Përgjithshëm i SHSKUK.

XII. Dispozitat kalimtare dhe përfundimtare

Neni 31

1. Detyrat dhe raportet ndërmjet QKUK dhe FM – UP, përkitazi me organizimin dhe funksionimin e veprimtarisë arsimore dhe kërkimore-shkencore në QKUK dhe njësitë e saja përbërëse organizative përcaktohen në përputhje me misionin e këtyre institucioneve, Ligjin për Shëndetësi o4/L-125, Rregulloren e FM – UP, Statutin e SHSKUK, dispozitat e këtij Statuti, si dhe aktet e tjera nën-ligjore.
2. Aktet e tjera të përgjithshme të parapara me këtë Statut, duhet të harmonizohen në afat prej gjashtëdhjetë (60) ditësh nga dita e hyrjes së tij në fuqi.
3. Deri në vendim tjetër, shërbimet e përbashkëta, selia dhe stema (shenja njohëse) e QKUK shërbejnë edhe si shërbim i përbashkët, seli dhe stemë e SHSKUK.

Neni 32

1. Në ditën e hyrjes në fuqi të këtij Statuti përfundon së vepruari fuqia e akteve të tjera që rregullojnë punën e QKUK dhe njësive të saj përbërëse organizative, nëse janë në kundërshtim me këtë Statut.

Neni 33

1. Ky Statut hyn në fuqi pas nënshkrimit nga Ministri i Shëndetësisë.

Prishtinë,
30 Maj 2014

Ministri i Shëndetësisë
Prof. Dr. Ferid Agani

